

APRIL 2013

24 Uur Beheerkamer	028 313 8000/8111
Brandweer	028 312 2400

# Bulletin

*Amptelike nuusbrieff van die Munisipaliteit Overstrand*

## EERSTE PROJEK SKOP AF OP GANSBAAI DEURBRAAK MET GAP-BEHUISING

Beplanning en voorafreëlings vir die Gansbaai GAP projek het die afgelope tyd so goed gevorder dat die munisipale behuisingssimplementeerder, Motlekar, en sy kontrakteurs die terrein op Vrydag 8 Maart in ontvangs kon neem.

GAP projekte is ontwerp om te voorsien in die behoeftes van eerstekeerhuiskopers wat nie vir laekostebehuising kwalifiseer nie, maar ook nie genoeg verdien om tot die ope mark toe te tree nie.

Die laaste struikelblokke is twee dae tevore uit die weg geruim tydens samesprekings met die Burgemeester, rdl Nicolette Botha-Guthrie, Voorsitter van die Portefeuljekomitee vir Beplanning en Infrastruktuur, rhr Pieter Scholtz, die Munisipale Bestuurder, mnr Coenie Groenewald, en verskeie ander rolspelers.

Dit is voorafgegaan met 'n vergadering op Dinsdag, 26 Februarie, waar die finansiële model vir die GAP projek en ander beginsels

met die Wes-Kaapse Departement van Menslike Nedersettings uitgeklaar is.

Die model behels dat behuisingssubsidiegeld as oorbruggingsmeganisme gebruik word om die projek vir alle partye bekostigbaar te maak sonder dat die projek ENIGE finansiële verpligtinge op die munisipaliteit plaas. Die koste van die grond wat aan die munisipaliteit behoort, word teen markwaarde van die eindverbruiker verhaal en grootmaatsdienste word via die munisipale bedryfsrekening vir behuising en elektrisiteitsinfrastruktuur deur die ontwikkelaar gedra en van die eindverbruiker verhaal.

Burgemeester Botha-Guthrie het daarop gewys dat die projek in die Agtjaarbehuisingplan van die Munisipaliteit opgeneem is en deel van die Geïntegreerde Ontwikkelingsplan vorm. "Ek is bly dat ons nou gereed is om die eerste GAP-projek in Overstrand af te skop, want die behoefte daarvoor is reeds jare gelede geïdentifiseer, maar

dit was eers nodig om verskeie prosesse af te handel om dit te laat realiseer."

Die projek word in drie fases van ongeveer 50 persele elk aangepak.

Die prys van die huise is nog nie gefinaliseer nie, maar in hierdie stadium lyk dit of die eenhede na gelang van hul grootte vir tussen R350 000 en R480 000 bemark gaan word. Die ontwikkelaar (Motlekar) dra die bemarkingsrisiko en sal na 36 maande die volle dienstekoste en erfprijs aan die Munisipaliteit terugbetaal as die huise nie verkoop nie.

Die Munisipaliteit het reeds verlede jaar kennisgewings geplaas om belangstellende en voornemende kopers van huise te nooi om vir die projek te registreer. Dié registrasies is in 'n GAP behuisingdatabasis opgeneem en aansoek sal in volgorde van die datum van indiening gehanteer word.

## STRAATKOMITEES KRY OPLEIDING

'n Loodsprojek vir die vestiging van straatkomitees in Zwelihle om die beskerming en sekuriteit van inwoners te bevorder, is verbasend suksesvol en kan moontlik gou na ander gemeenskappe uitgerol word. Daar bestaan reeds 41 van hierdie komitees en nog meer kan binnekort bykom.

Opleiding was een van die grootte behoeftes wat by 'n gesamentlike vergadering van die komitees uitgelig is. Op 11 Maart het Burgemeester Nicolette Botha-Guthrie die eerste kursus van so 'n opleidingsprogram geloods by 'n geleentheid wat deur die-koördineerders van die straatkomitees bygewoon is.

Dié kursus handel hoofsaaklik oor die Munisipaliteit Overstrand se verordeninge en lede van die straatkomitees sal op die hoogte gebring word oor hoe die inhoud daarvan vertolk en toegepas moet word.

Die opleiding word op Saterdag en Sondag deur snr inspekteur Zingani Tshetu van die Wetstoepassingsdepartement aangebied. Altesame 120 mense sal

opleiding ontvang. Hulle is in groepe van 20 verdeel en elke groep se opleiding word oor 'n naweek in die munisipale biblioteek in Zwelihle gedoen.

Die Burgemeester het gesê die inisiatief is belangrik om 'n nuwe gedissiplineerde samelewing te vestig - een waar almal saamwerk om die beste uitkoms vir die gemeenskap te bewerkstellig.

"Ons sê nie jy mag nie jouself geniet nie. Ons sê: wees altyd bedag op die behoeftes van ander. As iemand 'n partytjie beplan, gaan na die straatkomitee en spreek dan af tot wanneer die partytjie sal aanhou. As daar stout kinders is wat in die strate mors of openbare eiendom vandaliseer, gee hul name vir die

straatkomitees sodat hulle met hul ouers die probleem kan uitsorteer.

"Dit is hoekom dit vir straatkomiteelede belangrik is om wetgewing te ken en in staat moet wees om met enigiemand daarvoor te kan kommunikeer. Mense se ver-

troue moet sodoende gewen word."

Met 120 samelewingswagte op straat wat weet wat mag en wat nie, gaan Overstrand en Zwelihle binnekort 'n beter plek wees vir almal.



**By die loodsing van die Straatkomitee-opleidingsprogram was voor van links rdl Vuyani Macotha, senior inspekteur Zingani Tshetu, Burgemeester Nicolette Botha-Guthrie, Hoof van Verkeer en Wetstoepassing Rudi Fraser en rdl Elzette Nell. Agter derde van regs staan Adjudant-offisier Renier du Toit van die Polisie.**

## VERANDERING IN DIE FERNKLOOF ADVIESRAAD

Na 'n verbintenis van langer as 36 jaar met die Fernkloof-natuurreservaat in verskillende hoedanighede, het die welbekende mnr Frank Woodvine besluit om as lid van die Fernkloof-adviesraad uit te tree om 'n bietjie rustiger te word.

Op die adviesraad se vergadering van 22 Februarie 2013 is daar darem nie net afskeid geneem nie. Twee ewe-bekende inwoners van Hermanus, Estelle Spaarwater en Glynis van Rooyen, is deur die munisipaliteit aangewys om onderskeidelik belangrike insigte te bied oor die kultuurhistoriese asook toerisme-aspekte verbonde aan die bestuur van die reservaat.

Voorts het die munisipaliteit die heraanstelling van Linda Griffiths, Lee Burman, Antony van Hoogstraten en David Beattie in die adviesraad vir 'n verdere termyn van drie jaar bevestig.

Gelukwense is ook oorgedra aan Neville Green (wat voorheen in Kleinmond as omgewingsbestuursbeampte gedien het), met sy aanstelling as Bestuurder van Biodiversiteitsbewaring.

Hy sal in die hoedanigheid vir die Fernkloof-natuurreservaat verantwoordelik wees.


In 'n brief gerig aan mnr Woodvine wat by die vergadering voorgedra is, het Burgemeester Nicolette Botha-Guthrie gesê die beëindiging van sy regstreeks betrokkenheid by Fernkloof se bestuur was 'n geweldige verlies, veral aan dit wat as institusionele geheue bestempel kan word.

Woodvine se loopbaan het in 1976 begin toe hy as kurator van die Fernkloof-natuurreservaat aangestel is. Sy verantwoordelikhede is later uitgebrei om ook vir Hermanus se munisipale parke en tuine voorsiening te maak. Met sy aftrede as amptenaar in 1995 het hy die voorsitterskap van die Adviesraad vir vyf jaar aanvaar en in die daaropvolgende termyn was hy ondervoorsitter. Daarna hy het as adviesraadslid aangeby.

Die Burgemeester het gesê Woodvine kan met reg trots wees op die wonderlike werk wat gedoen is, nie net vir Fernkloof nie, maar vir om-

gewingsbewaring in die algemeen. Fernkloof Natuurreservaat is vandag 'n kosbare kleinood, 'n ongerepte gedeelte fynbos wat van die berg tot by die see strek. Dit bevorder nie net die beeld van Hermanus nie, maar is ook 'n nuttige opvoedingshulpmiddel en 'n toeriste-atraksie.

Sy het Woodvine verseker dat hy die toekoms van Fernkloof in goeie hande laat en dat sy werk voortgesit sal word. "Ek wil jou uit die diepte van my hart bedank vir die groot werk wat jy gedoen het," het me Botha-Guthrie geskryf.



Frank Woodvine

## GEbruik ELEKTRISITEIT EFFEKTIEF IN JOU KOMBUIS

Die koste van elektrisiteit styg weer binnekort. Graag voorsien ons jou van 'n paar wenke om jou veral in die kombuis te help om elektrisiteit meer effektief en doeltreffend te gebruik - veral gedurende spitsye.

Die nasionale spitsye is op woensdae tussen 07:00 en 10:00 en tussen 17:00 en 21:00. Gedurende hierdie periodes word daar in meeste huishoudings groot hoeveelhede elektrisiteit gebruik. Van hierdie verbruik kan ingeperk word of die gebruik kan verskuif na tye wanneer die druk op elektrisiteitsvoorsiening minder is.

### STOOF

Wanneer jy jou stoof gebruik, maak seker dat die grootte van die kastrol by die grootte van die stoofplaat pas. Hou asb 'n deksel op die kastrol om hitte en energie te bespaar. Jy kan ook die stoofplaat afskakel 'n paar minute voor die kos klaar gekook is. Daar is 'n groot hoeveelheid residuële energie in veral soliede plate wat op dié manier benut kan word.

### MIKROGOLFOONDE

Weet u dat 'n gewone stoof ongeveer dieselfde hoeveelheid krag gebruik as 18 mikrogolfoonde vir dieselfde taak? Dit maak dus sin om eerder 'n mikrogolfoond te gebruik om kos te kook. Jy gaan geld spaar en dit is baie vinniger.

### YSKAS

Wanneer jy jou yskasdeur lank oop los, veral die regopstaande een, dan verloor die yskas

sy koue lug. Om die nuwe lug weer af te koel, gaan baie elektrisiteit neem en stoot sodoende die kostes op. Moet dus nie tyd mors voor die oop yskas nie. Organiseer jou yskas so dat jy vinnig die item kry waarna jy soek en hou die koue lug binne.

### SKOTTELGOEDWASSER

Hou in gedagte dat elke keer as jy 'n skottel-goedwasser aanskakel, is dit so goed asof jy 20 gewone gloeilampies, of 120 CFL lampies, of 200 LED lampies aanskakel. Om krag te bespaar, wag eerder tot die skottelgoedwasser vol is en gebruik dit in die afspitsye.

### KETEL

In jou kombuis gebruik 'n ketel die meeste krag. Gooi net een koppie water in die ketel as jy een koppie tee wil maak en bespaar tyd en geld. Gebruik eerder 'n bekertipe ketel as 'n ketel met 'n breë basis. Maak ook gebruik van ketels wat goed geïnsuleer is en hitte langer hou en minder hitte nodig het om te kook. Onthou dit is makliker en goedkoper om water in 'n ketel te kook as op 'n stoof en nog goedkoper as jy een koppie water in die mikrogolfoond kook!

### TUIMELDROËR

As die weer mooi is, hang eerder jou klere buite op die wasgoeddraad. Dit is net so effektief as die tuimeldroër en sal jou 'n hoop geld met die loop van tyd bespaar. Onthou dat enigiets wat hitte gebruik, normaalweg 'n toestel is wat jou duur gaan kos in terme van elektrisiteitsverbruik.

## AFRIKA-SOKKERGEES TREF ZWELIHLE



Op dieselfde dag as die eindstryd vir vanjaar se Beker van Afrika-nasies, Sondag 10 Februarie 2013, kon dieselfde soort geesdrif op 'n kleiner skaal in Zwelihle ervaar word. Munisipaliteit Overstrand het met die samewerking van die Departement van Sport en Kultuur en die Regeringskommunikasie en Inligtingstelsel 'n mini Afrikabekertoernooi in Kwaza-Kwaza aangebied. Deelnemers was onder vyftien spelers van Zwelihle, Sandbaai en Mount Pleasant wat in spanne ingedeel was om die nasionale spanne wat in vanjaar se toernooi gespeel het, te verteenwoordig. Die dag het afgeskop met 'n inspirerende boodskap van Burgemeester Nicolette Botha-Guthrie. Die eindstryd was veral spannend. By die prysuitdeling is Babalo Bala as die speler van die toernooi aangewys en Bunny Martins as die top-doelskieter. Dank is ook uitgespreek teenoor Woolworths, Pick 'n Pay en Fruit en Veg wat ook tot die sukses van die dag bygedra het.

## AANTAL SAKKE VIR ELKE VERWYDERING

Daar heers steeds verwarring oor die aantal sakke wat elke huishouding mag uitsit per verwydering. Inwoners mag of 'n 240 liter drom, of vier sakke huisvuil uitsit, waarvan een sak 'n tuinvullis-sak mag wees. Onbepaalde aantal herwinning sakke mag saam met die vullis uitgesit word.

### DAE VAN VERWYDERING:

Administrasie	Area	Verwyderingsdag
Kleinmond	Kleinmond, Bettysbaai, Pringlebaai en Rooiols.	Maandag
Hermanus	Vermont, Fisherhaven en Hawston	Maandag
	Onrus, Chanteclair, Berghof, Sandbaai, Hemel-en-Aarde	Dinsdag
	Zwelihle, Mount Pleasant	Woensdag
	Westcliff, Northcliff en Hermanus Industriële Area	Donderdag
	Voëlklip, Eastcliff, Hermanus Heights, Kwaiwater	Vrydag
Stanford	Stanford	Maandag
Gansbaai	Pearly Beach, Buffeljagsbaai, Eluxolweni	Maandag
	De Kelders, Masakhane, Beverly Hills	Dinsdag
	Franskraal	Woensdag
	Kleinbaai, Baardskeedersbos	Donderdag
	Gansbaai, Masakhane en Beverly Hills	Vrydag



## The Songs

Die sopraan Magdalene Minnaar en haar begeleier Stefan Lombard se program THE SONGS word op Saterdag 20 April deur Overstrand Arts/Kunste na Hermanus gebring. 'n Luisterervaring van kunslidere, arias en operettewerke wag op diegene wat koloratuurvuurwerke en pragtige meesleurende melodieë geniet. Die konsert begin om 19:00 in die auditorium van die Overstrand-burgersentrum op Hermanus. Kaartjie kos R100 (R50 vir studente en leersers) en besprekings kan by Bellini op 028 312 4988 gedoen word. Kontak die sekretaresse, René du Plooy, by 082 940 4238 vir verdere navrae.

